

Hoem 05.06.18

NVE Konsesjonsavdelinga,  
Postboks 5091 Majorstua,  
0301 Oslo

**FRÅSEGN I SAMBAND MED SØKNAD OM LØYVE TIL Å REGULERE INSTEBOTNVATNET I VESTNES  
KOMMUNE, MØRE OG ROMSDAL FYLKE**

I samband med at Sesskraft A/S søker om løyve til å regulere Instebotnvatnet i Vestnes kommune, vil underskrivne grunneigarar på gardane Jemtegård, Hoem og Fagervik komme med følgjande uttale:

**Pkt. 1. Auke i kraftproduksjonen i høve til aktuell regulering.**

Sesskraft A/S har nå ein årleg middelproduksjon på elektrisk kraft på 16.8 GWh. Med regulering av Instebotnvatnet reknar ein med å produsere 18.55 GWh årleg. Dette utgjer ein auke på ca.11 %.

Sett frå grunneingarane si side verkar dette lite effektivt når ein vurderer det opp i mot dei inngrepa i naturområdet som reguleringa vil føre med seg.

**I utgangspunktet går difor grunneigarane inn for at prosjektet ikkje vert gjennomført og at området også framover blir bevart som den naturperla det er i dag.**

**Pkt.2. Oppdemming og tørrlegging.**

I følgje konsesjonssøknaden vil det å auke vassnivået med 0.5 meter føre til eit neddemt areal på ca. 3.5 dekar og tørrlagt areal ved nedtapping vil utgjere ca. 5.5 dekar.

Når eit areal på ca. 9 dekar blir påverka av reguleringa, vil vi karakterisere det som eit vesentleg inngrep i naturområdet.

Dersom konsesjon skulle bli gjeven, ber vi om at reguléringsnivået på 2 meter blir vurdert redusert for å gjere såra i naturen mindre.

Vi ser det som særleg viktig at reguléringsintervallet i månadene juni, juli og august blir sett til maksimalt 1 meter. Dette vil redusere dei negative verknadene av tørrlegging visuelt sett.

Vi føreset vidare at vassnivået i Urvatnet ikkje blir vesentleg påverka av reguleringa i Instebotn.

Særleg i sommarhalvåret blir området mykje brukt til friluftsliv kombinert med fisking i vatnet. Det er difor viktig at verknader av reguleringa ikkje blir merkbart her.